



INFO BILTEN OPĆINE CAZIN



Prijem za FK Krajinu



★ Melletta 2010

★ Internacionalna kolonija
skulptora Ostrožac 2010

★ FMOIT podržalo
projekte općine Cazin

Uvodna riječ načelnika općine

Dragi sugrađani, prijatelji i posjetioci

Raduje me činjenica da smo na 6.godišnjicu obilježavanja Dana općine stigli i do šestog broja našeg info bil-

tena. U međuvremenu smo pokrenuli i novu web prezentaciju naše općine koja će, nadam se, uz ostale promotivne aktivnosti, doprinijeti jačanju imidža općine Cazin i privući veći broj turista i investitora na ove prostore. Cilj nam je omogućiti interaktivniji pristup u radu organa uprave, ubrzati protok informacija i podići komunikaciju sa našim građanima na viši nivo. Zbog toga pozivamo sve građane i posjetiocio da pošalju svoju primjedbu, sugestiju, ili ideju na našu mail adresu press@opcinacazin.ba, a mi ćemo se potruditi da vam pravovremeno odgovorimo.

Gospoda Žorž i Ruegg u posjeti općini Cazin



U kabinetu načelnika općine razgovaralo se o bilateralnoj saradnji između Švicarske i Slovenije, a povodom mogućeg uspostavljanja Slovenske agencije za razvoj i saradnju (po uzoru na SDC). Ataše Ambasade Slovenije gospodin Emilijan Žorž i direktor Švicarske agencije za razvoj i saradnju gospodin Thomas Ruegg, razgovarali su sa načelnikom općine i Jedinicom za implementaciju projekta GOV-WADE u općini Cazin o mogućim modelima saradnje sa zainteresiranim donatorima.

Prema riječima gospodina Žorža, njihov primarni cilj je osposobljavanje regionalne razvojne agencije i izgradnja njihovih kapaciteta koji će dugoročno poslužiti razvoju općina i njihovih projektnih ideja. Također su zainteresirani za ulaganje u privredu i infrastrukturu, što su zapravo osnovni pravci strateških planova općinske administracije.

Načelnik Ogrješević je ovim povodom rekao da je općina Cazin stavila prioritet na infrastrukturne projekte, razvoj turističke ponude,

jačanje veza sa dijasporom, planiranje i koncept uspostavljanja biznis zona i poljoprivredu kao jednu od naših privrednih prednosti. "Mnogo smo do sada uradili i na izgradnji kapaciteta uprave, sami i u saradnji sa međunarodnim partnerima kroz razne projekte", izjavio je načelnik Ogrješević u toku razgovora sa gostima.

Gospodin Ruegg je pokušao da objasni situaciju u vezi sa sredstvima stranih donatora i rada mnogih organizacija koje se naslanjaju na pojedine zemlje EU, naglašavajući da će se ovi fondovi postepeno povlačiti prema IPA programima, zbog čega oni pokušavaju pronaći način da i dalje pomažu lokalnim zajednicama i regijama. "IPA fondovi služe za jačanje kapaciteta na državnoj razini, što će otežavati situaciju da se ulaže u konkretne infrastrukturne projekte općina. Zato mi ostajemo na ovim prostorima još jedno izvjesno vrijeme i zajedno sa našim kolegama i partnerima iz Slovenije, pokušaćemo naći najbolji model saradnje koja će neposredno ulagati u razvoj lokalnih zajednica", riječi su gospodina Ruegga, direktora SDC-a.





Saradnja općina

Cazin i Novi Grad

Kao rezultat saradnje na projektima zaštite okoliša i sliva rijeke Une, općine Cazin i Novi Grad su već duže vrijeme povezane, što je bio i povod za današnji radni sastanak. Naime, načelnica Novog, gospođa Snježana Rajilić, posjetila je općinu Cazin sa svojim saradnicima iz Lokalne razvojne agencije.

Cilj posjete su bili razgovori o konkretnim poduzetničkim projektima na području obe općine. Razmjena iskustava i informacija u ovim oblastima omogućava bolje razumijevanje između područja koji su prirodno i geografski naslonjeni jedni na druge. "Prema našim iskustvima općina Cazin je područje jake poduzetničke inicijative i evidentnog prosperiteta, zbog čega želimo vidjeti mogućnosti stvaranja uslova za povezivanje poduzetnika između naših općina", riječi su gospođe Rajilić, upućene načelniku Ogrješeviću i njegovim saradnicima. Dodala je još i to da je općina Novi Grad prije rata zapođljavala duplo veći broj

stanovnika, nego danas (oko 4.000), a razlog leži u činjenici da su dva prijeratna proizvodna kombinata otišla u stečaj. Međutim, njihova općina ima nekoliko interesantnih podsticaja za potencijalne ulagače i domaće poduzetnike, što je svakako njihova prednost.

Načelnik Ogrješević je govorio o osnovnim karakteristikama naše općine, privrednoj razvijenosti, poslovnim zonama, planovima za naredni period i sl. "Područje naše općine je od ranije poznato kao poduzetan kraj, gdje veliki broj ljudi pokreće vlastite biznise. To je posebno vidljivo kod realizacije infrastrukturnih projekata, po čemu je naše područje jedinstven slučaj", rekao je načelnik Ogrješević.

Sastanak je rezultirao određenim brojem konkretnih koraka saradnje za naredni period, što će možda biti vidljivo i iz zajedničkih nastupa u određenim projektima prema međunarodnim faktorima na našim prostorima i šire.



Sastanak sa penzionerima

Načelnik općine Cazin je u svom kabinetu po drugi put ove godine primio predstavnike Udruženja penzionera. Razgovarali su o aktuelnim problemima ove populacije stanovnika i njihovim planovima za budućnost. Ovom prigodom su uručili načelniku Ogrješeviću poklon zbog nesebične i kontinuirane podrške njihovim članovima.

Prema trenutnim podacima u općini Cazin živi blizu 3.500 penzionera, a najveći problem Udruženju predstavljaju socijalno ugroženi članovi, kojima su ove godine podijeljene razne vrste pomoći za liječenje, kupovinu lijekova i sl. u iznosu od 6.750,00 KM. Sastanak je rezultirao zajedničkom inicijativom da se izradi jedan progresivan Program za pomoć penzionerima po uzoru na



druge vidove pomoći koje općina omogućuje različitim kategorijama stanovništva. Između ostalog, načelnik je obećao pomoć u adaptaciji prostorija Udruženja rješavanjem pitanja ventilacije. Ujedno će im pomoći da organiziraju izlet i posjetu Udruženju penzionera općine Tešanj, za koje im nedostaju određena materijalna sredstva. "Bez obzira na grant u budžetu predviđen za penzionere naše općine, trudićemo se da im pomognemo gdje god je to moguće. Zbog prethodno ostvarene saradnje i konkretnih ideja, dužni smo olakšati položaj ove populacije u našem društvu", rekao je načelnik Ogrješević u razgovoru sa penzionerima općine Cazin.



Predstavnici Crvenog križa kod načelnika općine

Crveni križ općine Cazin od 8. do 15. maja 2010. godine obilježio Svjetski dan i nedjelju Crvenog križa. Tim povodom je upriličen prijem u Kabinetu načelnika općine za predstavnike ove organizacije. Cilj ovog sastanka se sastojao u pregledu aktivnosti posvećenih solidarnosti prema siromašnima i socijalno isključenim osobama u našoj zajednici, koje se ove godine odvijaju pod sloganom "Nije teško biti human".

Prema riječima gospodina Kličića, osnovni ciljevi ovogodišnjeg programa okrenuti su podizanju svijesti o siromaštvu i socijalnoj isključenosti, pomoći ugroženima koji žive na rubu egzistencije, naročito starim osobama i djeci te promoviranje misije i ciljeva Crvenog križa BiH.

"U okviru obilježavanja ovih značajnih datuma Društvo Crvenog križa BiH i entitetske organizacije Crvenog križa uručile su Međunarodnoj federaciji Crvenog križa i Crvenog polumjeseca ček iz kampanje za pomoć stradalom stanovništvu Haitija, u iznosu od 396.833,31 KM, koje su preko Crvenog križa donirali građani i organizacije u Bosni i Hercegovini", naglasio je predstavnik društva Crvenog križa BiH, gospodin Husein Kličić.

"Time se pokazuje koliko je naše društvo humano i u

vremenima sveopće krize i koliko je Crveni križ organizacija od posebnog značaja za naše društvo, rekao je načelnik Ogrješević u razgovoru sa gostima. Općina Cazin je i do sada podržavala aktivnosti Crvenog križa Cazin i nastojeće to činiti i ubuduće. Prema riječima načelnika Ogrješevića, ovakve akcije su od velikog značaja i velike vrijednosti za širenje humanizma u našoj zemlji. Naglasio je da moramo pronaći načina da uključimo veći broj subjekata u akcije pomoći socijalno ugroženim i bespomoćnim ljudima koji žive u našoj okolini.

Važno je napomenuti da je jedna od akcija Crvenog križa za ovogodišnje obilježavanje Svjetskog dana i nedjelje Crvenog križa podrška uposlenika općine Cazin i javnog sektora da kroz dobrovoljne priloge u vidu godišnje članarine podrže misiju i aktivnosti ove organizacije.



Delegacija Tadžikistana u Cazinu

Početak jula u općini Cazin je obilježen posjetom delegacije Tadžikistana i predstavnika Una consultinga iz Bihaća. Delegaciju su činila 2 predstavnika Švicarske agencije za razvoj i saradnju (SDC) za Centralnu Aziju, Ruslan Sadykov, nacionalni projektni inženjer i Nicolas Guigas, zamjenik glavnog direktora SDC-a u Tadžikistanu i dva konsultantna pomenute firme iz susjedne općine.

Posjeta se realizira u okviru Projekta GOV-WADE, s ciljem razmjene iskustava u oblasti zaštite voda i okolišne sanitacije. Goste je prvenstveno zanimao vodovodni sistem općine Cazin, način na koji se realizira opskrba i sistem kontrole potrošnje. Razgovarali su, između ostalog i o razvoju lokalne samouprave, njenim nadležnostima, mogućnostima finansiranja iz raznih fondova, podršci viših institucija vlasti i



sl. Prema njihovim riječima, općine u BiH su prošle određene faze razvoja i izgradnje vodovodne infrastrukture i predstavljaju koristan izvor informacija za projekte koji se trenutno pripremaju u njihovoj zemlji. "Ono što smo do sada imali priliku vidjeti i čuti, upućuje na činjenicu da je Cazin jedna vrlo dinamična, uređena i perspektivna sredina", rekao je gospodin Guigas.

Ova nekadašnja sovjetska zemlja danas ima 7,2 miliona stanovnika, od čega je 5 miliona u ruralnim područjima. Infrastruktura je uništena u toku građanskog rata od 1992-1997. godine i SDC trenutno pokušava pomoći lokalnim zajednicama da obezbijedi osnovne kapacitete za pružanje usluga svom stanovništvu.

Načelnik Ogršević je sa svojim timom saradnika,

uključenih u Projekat GOV-WADE, obezbijedio osnovne informacije u vezi sa tehničkim, institucionalnim i ekonomsko-finansijskim izazovima koji su pratili općinu Cazin kod realizacije infrastrukturnih projekata. "Naša općina je jedna od rijetkih u BiH koja je u potpunosti riješila pitanje vodosnabdijevanja. Predstoje nam projekat kanalizacije za koji se trenutno pokušavaju pronaći finansijska sredstva. Nadamo se da će i dalje građani općine Cazin samoinicijativno učestvovati u planiranju i realizaciji ovih projektnih ideja, s ciljem poboljšanja uslova života i poslovanja na ovim prostorima", rekao je načelnik Ogršević u razgovoru sa gostima iz Tadžikistana.

Nakon razgovora u kabinetu, delegacija je obišla novoizgrađenu Šalter salu općine Cazin i posjetila JKP "Vodovod".



Donacija školama na području općine Cazin



Predstavnik norveške organizacije Sandnes-Dubrovnik Group, gospodin Pucar Ratko posjetio je općinu Cazin početkom mjeseca juna. Riječ je o nevladinoj organizaciji formiranoj 1993.godine od strane uglednih i utjecajnih pojedinaca iz gradova Sandnes i Stavanger. Osnovni cilj njihovog djelovanja jeste pomoć zemljama bivše Jugoslavije, sa naglaskom na obrazovni sistem, odnosno škole u pojedinim općinama. Sastanak je vodio Pomoćnik načelnika Službe za opću upravu i društvene djelatnosti, gospodin Hasan Salkić, a prisutni su bili direktori osnovnih i srednjih škola.

Između ostalog, razgovaralo se o potrebama centralnih i područnih škola, stanju u srednjem obrazovanju i neophodnom opremanju škola kvalitetnijim namještajem i zadovoljavajućim didaktičkim pomagalicama.

Budući da je sastanak bio radnog karaktera, dogovorena je isporuka opreme za OŠ Liskovac, OŠ Šturlić, OŠ Tržačka Raštela i za I Srednju školu, u ponedjeljak, 14.06.2010.godine. Ovim školama je donirana oprema za tehničke kabinete, računarska oprema, namještaj, kopirni aparati i sl. Saradnja sa ovom organizacijom se nastavlja zbog čega će uslijediti nove isporuke pomoći školama u našoj općini.

Prema riječima profesora Salkića, općina bi trebala preuzeti na sebe obavezu interent priključka za sve škole, što će u narednom periodu i biti realizirano.



Godina 2010 / Septembar / Broj 6



Predstavnici općine Cazin na GAP-ovoj konferenciji o urbanizmu

Dana 1. i 2. jula u Bosanskoj Krupi je, u organizaciji GAP projekta (Projekat dobre uprave), održana Konferencija na temu: „Unaprijeđenje procesa planiranja i izdavanja dozvola u oblasti urbanizma i građenja uspostvom Centra za dozvole (CID)“, u čijem radu su aktivno učestvovali i predstavnici općine Cazin.

Konferencija je bila završna manifestacija ciklusa od deset radionica na ovu temu, a općine Cazin, Bosanski Petrovac, Ribnik i Šipovo bili su sudomaćini ovog događaja.

Predstavnici općine Cazin su tom prilikom prezentirali rezultate postignute realizacijom projektnih aktivnosti u vezi sa uspostavljanjem Centra za izdavanje dozvola, primjenom metode zoniranja i geoinformacionog sistema (GIS) na testnom području regulacionog plana, te stvaranjem mogućnosti za elektronsko izdavanje dozvola.

Dodijeljena su i priznanja za aktivno učešće i uspješno okončanje ovog ciklusa, gospodi Dženani Imširpašić, članu Savjetodavnog odbora, Mušić Nerminu, članu Radne grupe Savjetodavnog odbora i Mujakić Ibrahimu, koordinatorskom članu Radne grupe Savjetodavnog odbora.

Konferenciji su prisustvovali i zvaničnici lokalne uprave i eksternih partnera sa lokalnog i viših nivoa oba entiteta (resornih ministarstva, direkcija i geodetskih uprava, komunalnih i infrastrukturnih organizacija), te ostalih institucija koje aktivno učestvuju u kreiranju i provođenju reformi u ovoj oblasti.

Uspješan završetak pomenutog ciklusa predstavlja još jedan značajan korak u stalnom unaprijeđenju kvaliteta usluga u Općini Cazin.

Prijem za FK "Krajina"



"Uloženi trud i entuzijazam naših igrača su za svaku pohvalu. Naglašavam da je sport jedna od naših strateških grana, zbog koje i dalje mnogo vremena i sredstava ulažemo u njihovo tehničko, organizaciono i finansijsko unapređenje. Hvala našim privrednicima i ljubiteljima sporta što su pomogli općini i Sportskom savezu da reorganizira i stabilizira FK "Krajina". Naredni period treba da bude u znaku stvaranja jake baze igrača za buduća takmičenja i pobjede naše Krajine", rekao je načelnik Ogřešević obraćajući se igračima.

Sastanku su prisustvovali i treneri FK Krajina Hakija Beganović i Rasim Omanović, predsjednik Sportskog saveza općine Cazin, gospodin Emir Dautović, kao i članovi Upravnog odbora ovog kluba, gospoda Irfan Durić i Ibro Adilagić.

Načelnik općine Cazin je povodom ulaska FK Krajina u viši rang takmičenja upriličio prijem za igrače i njihovo rukovodstvo u svom kabinetu. Ova mlada i reformirana ekipa ostvarila je zavidne rezultate u posljednjoj sezoni takmičenja i zasluženo ušla u Prvu ligu FBiH.

Prema riječima predsjednika kluba, gospodina Nijaza Beganovića, općina i Sportski savez su pružili veliku podršku ovom klubu i njihovim planovima u prethodnoj sezoni zbog čega je bilo lakše doći do ovakvog rezultata. Istaknuli su da im je trenutno najveći problem neriješeno pitanje pomoćnog stadiona, u vezi sa čime je načelnik Ogřešević obećao bezuslovnu podršku i pomoć.



Jubilej NK "Gomila"

Općina Cazin je u maju organizirala nogometni turnir veterana, u povodu obilježavanja 35. godina postojanja NK "Gomila". Turnir je poprimio internacionalni karakter, zbog učešća ekipa iz Hrvatske i Slovenije. U dva dana ova sportska manifestacija se odigravala na stadionima MZ Stijena i MZ Pjanići. Pobjedničku titulu turnira ponijela je ekipa NK "Krajina" Cazin.

Turnir je otvorio općinski načelnik koji je ujedno i pokrovitelj ovog sportskog događaja, realiziranog u saradnji sa Sportskim savezom naše općine.



Cazinski taekwon-do klub u RTL ligi

Nakon što su cazinski borilački sportovi počeli nizati uspjehe na domaćoj i međunarodnoj sportskoj sceni, došao je red i na TaeKwon-do klub "Bosna". Naime, članovi ovog kluba su ušli u regionalnu taekwon-do ligu (RTL), koja podrazumijeva ekipno takmičenje. Prema pravilima ove lige, svaki takmičar nastavlja na prethodne rezultate svog saigrača.

Načelnik općine je tim povodom upriličio prijem za igrače i članove uprave kluba "Bosna", kako bi razgovarali o nastavku uspješne saradnje i jačanju borilačkih sportova na našim prostorima.



"Budući da je ova liga jedna novina u borilačkim sportovima, da podrazumijeva velike pripreme, veliki trud i materijalna sredstva, potrudimo se da uz koordinaciju sa Sportskim savezom realiziramo planirane aktivnosti i takmičenja ovog kluba", riječi su načelnika Ogřeševića.

U RTL ligi mogu učestvovati i ostali borilački sportovi, ali prema pravilima lige koja se odnosi na taekwon-do. Unutar našeg aktuelnog sastava trenutno igra 30 registriranih igrača, koji sezonu moraju odigrati u našim dresovima, bez obzira iz koje općine dolazili. Ligu čine 4 zemlje (Slovenija, Hrvatska, BiH i Srbija), što dovoljno govori o jačini i kvalitetu ovog ranga takmičenja.



Juniorska reprezentacija na pripremama u Cazinu

Općina Cazin je ove godine zvanični domaćin priprema ženske košarkaške juniorske ekipe BiH. Tim povodom su se Zdravko Knežević, generalni sekretar Košarkaškog saveza BiH i Mensur Mulalić, član Upravnog odbora ovog saveza sastali sa načelnikom Ogřeševićem u njegovom kabinetu. Potpisan je i Protokol o saradnji i pokroviteljstvu za desetodnevne pripreme košarkašica koje su 28.jula nastupale na evropskom košarkaškom prvenstvu za juniorke u Rumuniji.

Prema riječima gospodina Kneževića, djevojke su imale kombinovan način priprema i jednu kontrolnu utakmicu sa seniorskom reprezentacijom BiH, koja se nalazila na pripremama u Novom Gradu.



"Čini se da je Cazin postao grad košarke u posljednjih nekoliko godina. Raduje nas da možemo pomoći razvoj sporta u BiH, posebno kada je u pitanju omladina. Sve je spremno za dolazak naših mladih sportašica i nadamo se da će Cazin još jednom biti uspješan domaćin", rekao je načelnik Ogřešević neposredno pred dolazak mladih sportašica u našu općinu.

Počela izgradnja novog igrališta u MZ Majetići

U junu ove godine na području MZ Majetići počelo je asfaltiranje novog igrališta čiju izgradnju finansira općina Cazin. Projekat je od posebnog značaja za ovu MZ, ali i šire područje, jer se radi o velikom broju stanovnika koji nisu imali slične sadržaje za svakodnevne sportske aktivnosti. Najveću korist ovo igralište će naravno donijeti najmlađim naraštajima, ali i onima koji se sportom bave u rekreativne svrhe.



Igralište ima dimenzije 28x62, a vrijednost prve faze projekta iznosi 43.000,00 KM.



Početnim radovima asfaltiranja sportskog igrališta u MZ Majetići prisustvovao je i načelnik Ogršević sa svojim saradnicima. Između ostalog je naglasio da su ovakvi projekti dio šireg strateškog plana u kome se svakoj MZ trebaju obezbijediti osnovni sadržaji za poboljšanje kvaliteta života. "Na osnovu ovakvih i sličnih projektnih planova, stanovnici mjesnih zajednica moći će zadovoljiti osnovne funkcije života u svojim primarnim mjestima stanovanja, što je krajnji cilj ovakvih akcija", rekao je načelnik u razgovoru sa mještanima MZ Majetići.

FMOIT podržalo dva projekta općine Cazin

Federalno ministarstvo okoliša i turizma u 2010. godini, u cilju razvoja turizma kao strateške grane privrede, do konačne izrade i usvajanja strategije razvoja turizma od značaja za Federaciju Bosne i Hercegovine kojom bi se i sistematski riješila oblast turizma, finansijski će podržati određene programe kroz Odluku o usvajanju programa utroška sredstava sa kriterijima raspodjele sredstava "Transfer za razvoj turizma i okoliša u Federaciji Bosne i Hercegovine".

Ove godine je ministarstvo odlučilo podržati i dva projekta općine Cazin. U sklopu "Sufinansiranja

programa u cilju zaštite okoliša, koji rješavaju probleme zagađenja opasnim otpadom, te predstavljaju veliki pritisak na okoliš i ugrožavaju život i zdravlje ljudi", ovo ministarstvo je dodijelilo 10.000,00 KM općini za projekat "Sanacija divljih odlagališta opasnog otpada". Drugi projekat se tiče "Izrade i postavljanja urbane turističke signalizacije na području općine Cazin". Ova sredstva su dodijeljena iz programa "Sufinansiranje novih turističkih proizvoda, izrade horizontalne i vertikalne turističke signalizacije i tematskih cesta u kantonima i općinama..." u iznosu od 5.000,00 KM.

Rujnica

dobila

novi put

i rasvjetu

Svečano je obilježen završetak nekoliko značajnih infrastrukturnih projekata na području MZ Tržačka Raštela, koja graniči sa bihaćkom MZ Gata. Inicijativa mještana, koja je pokrenuta 2008. godine, naišla je na podršku općine Cazin i zajedničkim aktivnostima doživjela i svoj svečani epilog.

Prema riječima predsjednika građevinskog odbora, gospodina Hasana Dolića, radi se o završetku puta ukupne dužine od 3.600 m i vrijednosti od oko 700.000,00 KM.

Pored ovog puta puštena je u rad i rasvjeta sa 107 rasvjetnih tijela, koja je uz obnovljenu niskonaponsku mrežu dodatno uljepšala, unaprijedila, ali i urbanizirala ovo naselje.

Svoje zadovoljstvo nije krio ni prvi čovjek naše općine. „Završavajući ove značajne infrastrukturne projekte na području Rujnice otvaramo mogućnost

za dalji razvoj i realizaciju novih projekata, koji će nas dovesti do kvalitetnog iskorištavanja resursa i potencijala u ovom dijelu naše općine“, rekao je načelnik Ogršević velikom broju okupljenih mještana i posjetioca iz drugih MZ-a. Čin svečanog presjecanja vrpce obavili su općinski načelnik, predsjednik građevinskog odbora i najstarija mještanka ovog naselja, Fatima Šabanagić.



Novi putni pravci u općini Cazin

Na osnovu Memoranduma o razumijevanju koji je općina Cazin potpisala sa Uredom za koordinaciju projekata (PCU) Ministarstva poljoprivrede, vodoprivrede i šumarstva FBiH, predviđena je rekonstrukcija ruralne infrastrukture u nekoliko MZ na području naše općine. Sredstva su obezbijedena na osnovu kredita OPEC fonda, a uloga provajdera za implementaciju projekata pripala je OdRazu.

U okviru izvedbe projekata planirano je da se izvedu radovi opisani u pojedinačnim Izvedbenim projektima izrađenim od strane općine, verifikiranim od strane OdRaza i prihvaćenih od strane PCU. Na osnovu liste predloženih projekata, izabrana su tri lokalna putna pravca za koje su potpisani ugovori protekle sedmice. Riječ je o lokalnom putu za sela Podgredina i Tromeda, ukupne vrijednosti 190.452,80 KM, put za sela Stijena i Miostrah u iznosu od 184.944,16 KM i putni pravac u selu Mutnik, čija će realizacija koštati 178.256,36 KM.

Prema potpisanom Memorandumu, općina Cazin je obavezna da u svim projektima učestvuje sa 30% vlastitih sredstava, da uradi izvedbeni projekat, obezbijedi sve potrebne dozvole i osigura pravilno korištenje "objekta" nakon završetka radova.



Tržačka Raštela dobila novi put

regionalnom dionicom između općina Cazin i Bihać. Prema riječima predsjednika građevinskog odbora, gospodina Mirsada Džinovića, 25 domaćinstava je ovim projektom dobilo mogućnost bržeg i lakšeg saobraćanja prema matičnoj, ali i susjednoj općini.

Novu dionicu asfaltiranog puta, u vrijednosti od 135.000,00 KM, dobila je MZ Tržačka Raštela. Put je otvorio načelnik općine Cazin, gospodin Nermin Ogřešević, zajedno sa najstarijom mještankom naselja Bukovica-Džinovići. Dužina puta iznosi cca 900 m, a u finansiranju je učestvovala općina Cazin i JU "Komunalno stambeni fond" sa 70% sredstava, dok su ostalih 30% obezbijedili sami mještani.

Značaj ovog puta se ogleda u njegovoj poveznici sa

"Iskreno se nadam da će u skorije vrijeme sve naše MZ-e i naselja biti pokrivena osnovnom infrastrukturom koja utiče na kvalitetu ljudskog života. Ovo je još jedan dokaz da razvojni ciljevi mogu biti ostvareni kroz saradnju predstavnika lokalnih vlasti i stanovništva općine Cazin. Vjerujem da će budućnost donijeti još bolje rezultate u pogledu zajedničkog djelovanja i privređivanja, za dobrobit svih", rekao je načelnik Ogřešević obraćajući se mještanima naselja Džinovići.



Melletta 2010



Druge sedmice mjeseca juna općine Cazin, Bihać i grad Banja Luka su bile domaćini manifestacije "Melletta Fior 2010". Ovom manifestacijom se obilježava dan pobjede austrougarske vojske nad italijanskom armijom u bici na Monte Meletti. Od 4 regimente koje su osnovane na području BiH (kasnije ih je bilo mnogo više), posebna pažnja se posvećuje drugoj bosanskohercegovačkoj regimenti (poznatijoj kao Bošnjačka regimenta), čiji je domicil u austrougarskoj vojsci bila Banja Luka. Ova regimenta je nosilac 42 zlatne medalje, odlikovanja najvišeg ranga austrougarske vojske.

Drugi dan Programa, na prijemu u kabinetu načelnika općine Cazin prisutan je bio veliki broj učesnika, među kojima i ambasador Republike Austrije. Zajedno sa njim, našu



općinu su posjetili i predstavnici udruženja "Bosanskohercegovačko-austrijskog prijateljstva" iz Sarajeva, austrijskog crnog križa, predstavnici udruženja veterana Italije i gradonačelnik grada Follina. Domaćini su za svoje goste upriličili izložbu ULUUSK i Rudolfa Brunera Dvoraka "Bosna 1905", nakon čega je položeno cvijeće na

centralnom šehidskom spomen obilježju.

Načelnik Ogřešević je sa gostima razgovarao o karakteristikama naše općine, njenim potencijalima i mogućnostima investiranja u razne oblasti privrede na našim prostorima. Naglasak je svakako stavljen na prijateljske odnose BiH,

Austrije i Italije, naročito kada je u pitanju USK, koji se geografski više naslanja na ove prostore. "Ovaj susret je prilika za osvjetljavanje pozitivnog trenda razvoja ideje bošnjaštva, čime se zapravo treba otvoriti put dalje evropeizacije bošnjaštva i BiH kroz kontakte sa demokratskim snagama Evrope", riječi su načelnika Ogřeševića.

Nakon prijema, gosti su obišli Stari grad Cazin, staru Medresu i posjetili Stari grad Ostožac. Unutar zidina ovog grada za goste je upriličeno razgledanje, osvrt na historiju zamka i ručak sa tradicionalnim bosanskim jelima.



Karl Wehrle u općini Cazin

Predstavnik SDC-a, gospodin Karl Wehrle posjetio je općinu Cazin i održao sastanak sa općinskim članovima Jedinice za implementaciju projekta GOV-WADE i predstavnicima Una consultinga iz Bihaća. Cilj ovog sastanka je monitoring i evaluacija realiziranih aktivnosti, jačanje kapaciteta uprave za pružanje usluga u ovoj oblasti i razgovori o Projektu kanalizacije u MZ Ljubijankići.

Razgovaralo se o modalitetima i vremenskim rokovima za realizaciju preostalih aktivnosti Operativnog plana za vode 2010.godine. Konstatirano je da su dosadašnji termini, aktivnosti i sredstva ispoštovani u cjelosti, zbog čega se smatra da će realizacija ostatka Operativnog plana teći pretpostavljenim tokom.

Kada je u pitanju jačanje kapaciteta općinske uprave za implementaciju aktivnosti iz VOS, na redu je popunjavanje



upražnjenih radnih mjesta u Službi za urbanizam i zaštitu okoliša, koje se odnose na ovu oblast. Prema riječima gospodina Wehrlea, neophodno je uspostaviti koordinaciju između svih faktora uključenih u procese zaštite okoliša, vodnih resursa i sl. Dakle, općina i njena javna preduzeća moraju funkcionirati kroz koordinaciju i saradnju, bez miješanja u isključive nadležnosti svakog od pomenutih subjekata.

Nakon sastanka, domaćini su sa gostima obišli MZ Ljubijankići kako bi prikupili preliminarne informacije na osnovu kojih će se pristupiti izradi projektnog prijedloga za kanalizacionu mrežu i prečištač otpadnih voda.

Član Predsjedništva BiH u Cazinu



Načelnik Ogřešević je u svom kabinetu primio visoku delegaciju iz Predsjedništva BiH i općine Bihać, koji su došli u pratnji člana Predsjedništva BiH, gospodina Željka Komšića. U sastavu delegacije su bili i počasni konzul BiH u Turskoj Kemal Ahmet Baysak i Nerkez Arifhodžić, bivši ambasador BiH u Turskoj. Prema riječima gospodina Komšića, radi se o ljudima koju gaje veliku ljubav prema BiH. "Gospodin Baysak je porijeklom iz BiH, uspješan biznismen, realiziran poslovni čovjek, koji nema nikakvog profitnog interesa u BiH, izuzev ljubavi prema ovim krajevima i ovim ljudima", rekao je Komšić.

Razgovaralo se o situaciji u općini Cazin, problemima koji muče lokalno stanovništvo, prednostima i nedostacima neposredne brige o ljudskim životima i sl. "Budući sam i sam obavljao dužnost načelnika općine, jasno mi je sa kakvim se problemima susreću čelnici lokalnih samouprava u BiH. Zato i jesam ovdje, sa ciljem da

učinimo nešto i za ovu sredinu", rekao je gospodin Komšić u svojoj izjavi za medije.

Predloženo je bratimljenje općine Cazin i turskog grada Urla, koji se nalazi u neposrednoj blizini Izmiru, kao jedna od najvažnijih turističkih destinacija ove provincije. Gospodin Baysak je objasnio prednosti ekonomske i kulturne prirode koji proizilaze iz ovakvih sporazuma između dva grada i time opravdao svoju poziciju prvog počasnog konzula u nekoj zemlji kojeg je imenovalo naše Predsjedništvo. Danas je ovakvih ljudi puno više, ali on je krenuo prvim koracima da gradi bolju poziciju za građane BiH u ovoj velikoj zemlji i, na našu radost, posjetio i općinu Cazin. Njegov cilj je da uspostavi vezu između privrednih i poduzetnih ljudi u ovim zemljama, na čemu će u



narednom periodu zajednički raditi gospodin Baysak i načelnik Ogřešević sa svojim saradnicima.

Opuštena atmosfera i srdačni razgovori pogodovali su jačanju međusobne komunikacije, identificiranju zajedničkih problema i mogućnosti njihove realizacije kroz saradnju sa općinom Bihać. "Ovaj susret je prilika da zajedno gradimo bolju budućnost za stanovnike naše države, a u ovom slučaju općine Cazin. Vrijedilo je upoznati ove divne ljude iz bratske nam zemlje Turske i uspostaviti konkretne korake za nastavak saradnje sa općinama u regiji Izmir. Nadam se da će ovakvih susreta u našoj budućnosti biti mnogo više", istaknuo je načelnik Ogřešević na kraju razgovora u kabinetu.

Nakon ovog susreta, delegacija je u pratnji načelnika Ogřeševića prošetala našom čaršijom i nastavila prijateljske razgovore uz kafu u jednom od lokalnih barova. Epilog posjete bila je tribina koju je gospodin Komšić održao u Domu kulture.



Godina 2010 / Septembar / Broj 6

JKP "Čistoća" dobila reciklažno dvorište

Vlada Češke Republike je u okviru nastavka projekta Češke inostrane saradnje "Isporuka tehnologije za uvođenje integriranog sistema upravljanja otpadom u USK", Javnom komunalnom preduzeću "Čistoća" doo Cazin donirala montažnu halu – postrojenje koje čini integralni dio reciklažnog dvorišta. Svečana primopredaja donacije u vrijednosti 40.000,00 KM održana je na lokaciji pijace u Slatini, gdje je smješteno ovo postrojenje.

Zajedno sa načelnikom Ogřeševićem, halu je otvorio gospodin Zdenjek Železnik kao predstavnik firme Geo-test Brno iz Češke Republike. Ovim svečanim činom označen je završetak procesa opre-



manja reciklažnog dvorišta, čija je ukupna vrijednost 100.000,00 KM. Ranije je JKP "Čistoća" od istih donatora dobila opremu direktno vezanu za reciklažu ko-

munalnog otpada i to: hidrauličnu presu za baliranje reciklažnog otpada te deset kontejnera za reciklažu zapremine 10 m³.

"Ovakvi projekti predstavljaju značajan iskorak u našim nastojanjima da uspostavimo kvalitetan sistem zbrinjavanja otpada na prostoru općine Cazin i očuvanja naše okoline. Zahvaljujem se Vladi Češke Republike i predstavnicima firme Geo-test Brno na kvalitetnoj saradnji i kontinuiranim naporima da pomognu našoj općini i JKP "Čistoća" da prati savremene trendove okolišne sanitacije", rekao je načelnik općine u svojoj izjavi za medije.

Prezentacija za načelnike SZ regije

Našu općinu su nedavno posjetili gospoda David Müller-vođa tima EURELSMED, Pavlos Kollias i Leif Sonderskov-ključni eksperti EURELSMED kako bi održali prezentaciju na temu "Lokalni i regionalni ekonomski razvoj" za načelnike općina regije sjeverozapadna BiH. Prezentaciju je organizirala RDA NW u okviru projekta "Podrška izgradnji institucionalnih kapaciteta za regionalni i lokalni ekonomski razvoj i razvoj malih i srednjih preduzeća Bosne i Hercegovine".

Riječ je o projektu koji je startao prošle godine i trajaće do 2012., sa ukupnim budžetom od 2,458 miliona eura. Implementator projekta je britanska firma WYG International, a korisnici su regionalne i lokalne razvojne agencije u direktnom obuhvatu. Indirektno, projekat se odnosi na općine i sektor malih i srednjih preduzeća. Projekat je finansiran od strane EU, a cilj mu je objediniti napore prethodnih projekata u ovoj oblasti i potaknuti ekonomski rast i zapošljavanje. Međunarodni i domaći eksperti kroz ovaj projekat će vršiti obuku službenika i funkcionera u lokalnim zajednicama za efikasno upravljanje projektima, razumijevanje fokusa EU, razvoj vaučerske šeme za MSP i sl.

Prema riječima gospodina Millera projekat je svojevrsna nadogradnja ranijih projektnih aktivnosti u ovom segmentu i radi se uporedo sa drugim projektima EU u području lokalnog i regionalnog ekonomskog razvoja. "Naš osnovni zadatak je jačanje kapaciteta lokalnih vlasti i podrška u razvoju MSP koji će u budućnosti biti nosioci ekonomskog razvoja lokalnih zajednica", rekao je gospodin Miller.



Francuska ambasadorica posjetila općinu Cazin

Dana 16.06.2010.godine općinu Cazin posjetila je visoka delegacija koju su činili zapovjednik snaga EUFOR-a u BiH general-major Bernhard Bair i ambasadorica R Francuske u BiH N.J.E. Maryse Berniau. Povod za posjetu bila je dodjela nagrade učeniku IV razreda OŠ Pećigrad, tačnije iz područne škole Donja Lučka. Beganović Sandi je sa svojim likovnim radom osvojio prvo mjesto u kategoriji osnovnih škola u Projektu pod nazivom "Moj evropski susjed". Ovo takmičenje osnovaca se realizira pod pokroviteljstvom EUFOR-a i uz podršku ambasada EU u BiH, a dešava se na području cijele Bosne i Hercegovine.

Delegaciju je zajedno sa direktoricom škole i ostalim osobljem, dočekao i općinski načelnik Nermir Ogršević. Nakon kratke stanke uz bosansku kafu za goste u centralnoj školi, delegacija se uputila prema područnoj školi u Donjoj Lučkoj, gdje su mališani nižih razreda pripremili i kratki program za uvažene goste. Prilikom dodjele nagrade ambasadorica je izrazila svoje zadovoljstvo što je ovakav događaj povod njene prve posjete općini Cazin, dok je general Bernhard, zahvaljujući se ambasadama EU na podršci, ukazao na važnost ovog projekta u koji se uključeni mladi

sa područja cijele Bosne i Hercegovine. „Moram reći da je moj prvobitni dojam-mladost, jer smo došli da posjetimo mlade jedne osnovne škole da bismo dodijelili nagradu učeniku koju je osvojio na EUFOR-vom konkursu, a mladi su za nas pripremili mali program što je na mene ostavilo jedan lijep utisak. Isto tako sam stekla utisak otvorenosti prema EU i susjedima. Npr. ova škola je prvi put učestvovala na ovom takmičenju i učenik koji je osvojio nagradu nacrtao je jedan predivan crtež na temu Evropa i njeni susjedi, što pokazuje da nastavnici već uče djecu o Evropi i putu ka EU. Također moram spomenuti da je sasvim jasno da se ovo područje razvija sve brže i brže, na osnovu onog što je rekao načelnik općine, ali i na osnovu onog što smo imali priliku vidjeti dok smo se vozili kroz ovu lokalnu zajednicu”, istaknula je ambasadorica Berniau.

Nakon Donje Lučke, delegaciju je u kabinetu primio općinski načelnik. Razgovaralo se o ekonomskom napretku općine Cazin i njenim osnovnim potencijalima. General EUFOR-a, pod čijim se pokroviteljstvom odvijalo ovo takmičenje, naglasio je da se prvi put nalazi u općini Cazin, ali da ima vrlo ažurne i pozitivne informacije o ovom kraju putem LOT tima u Cazinu. "Moram priznati da sam prijatno iznenađen kako ljudi grade bolju budućnost za cijelu BiH. Meni kao komandantu EUFOR-a izuzetno je drago i od velike važnosti da damo podršku mladima da rade zajedno na jednom projektu koji obuhvata područje cijele BiH. Mladi su zapravo istinski čuvari mira i budućnost ove zemlje", istaknuo je general-major Bair.

"Želimo da kao sredina pošaljemo poruku otvorenosti i naše orijentiranosti na budućnost i razvoj. Želimo iskoristiti ovakve prilike da upoznamo druge sa onim što smo napravili do sada i našim planovima za budućnost, jer nam je u tim nastojanjima potrebna šira podrška i pomoć", rekao je načelnik Ogršević prilikom razgovora sa predstavnicima ove delegacije. Istaknuo je da općinu Cazin raduje činjenica što u zadnje vrijeme naše područje pohoduju mnogi ambasadori i predstavnici međunarodnih asocijacija. Prema njegovom mišljenju to je pozitivan signal koji može biti dobra prilika kako za Cazin tako i za šire područje.



Uspješni projekti Doma kulture

Prema Planu i programu rada JU "Dom kulture", urađeno je nekoliko projektnih prijedloga koji su aplicirani na adrese viših institucija vlasti. Nedavno su ovoj ustanovi odobrena dva projekta od strane Fondacije za muzičke, scenske i likovne umjetnosti i Fondacije za bibliotečku djelatnost u ukupnom iznosu od 11.700,00 KM.

Odlukom Ministarstva obrazovanja, nauke, kulture i sporta USK, iz granta za kulturu, ovoj instituciji je na osnovu projekta odobreno 3.000,00 KM za nabavku knjiga Narodnoj biblioteci koja djeluje u sastavu Doma kulture. Za istu namjenu od strane Ministarstva civilnih poslova BiH Odlukom o dodjeli sredstava tekućeg granta „Pomoć programu sufinansiranja institucija kulture u Bosni i Hercegovini“ za 2010. godinu, obezbijedena su sredstva u iznosu od 20.000,00 KM.

Pored ovih značajnih sredstava za obogaćivanje knjižnog fonda naše biblioteke, Ministarstvo okoliša i turizma FBiH i Ministarstvo kulture i sporta FBiH naložilo je Turističkoj zajednici USK da izvrši uplatu 40.000,00 KM JU "Dom kulture" Cazin, za realizaciju programa konzervacije zidina Starog grada Ostrožca.

Počinje "Internacionalna kolonija skulptora"

Kako je ranije najavljeno, prvi dio mjeseca juna, rezervisan je za početne aktivnosti "Internacionalne kolonije skulptora Ostrožac 2010". Naime, u subotu, 29.05.2010.godine, našu općinu su posjetila 2 studenta završnih godina Akademije likovnih umjetnosti iz Sarajeva u pratnji njihovog profesora klase. Cilj ove posjete jeste upoznavanje sa fundusom naše Kolonije i rad u autohtonom kamenu bihacitu skulpture prema izboru samih studenata. Njihovi radovi ostaju u vlasništvu Kolonije i postaju njen sastavni dio.

Ovo je već treća generacija studenata Akademije likovnih umjetnosti iz Sarajeva koja dolazi na naše prostore i time oplemenjuje svoj rad i iskustvo.


Drugi dio Kolonije počeo je u tradicionalno u augustu. U njenom radu ove godine učestvovao je veliki broj akademskih kipara iz naše zemlje i inostranstva. Urađene su skulpture u kamenu bihacitu i terakoti (pečenoj glini).

Predstava "Gospođica Julija" u Cazinu

Zbog uspješne saradnje sa Narodnim pozorištem iz Sarajeva, naturalistička tragedija Augusta Strindberga pod nazivom "Gospođica Julija", gostovala je u Domu kulture Cazin, 24.06.2010.godine. Ova drama predstavlja istinsku poslasticu za glumce i reditelje u svim vremenima i u svim svjetskim teatrima. Razlog je to više što su općina Cazin i Dom kulture pružili svojoj publici uživanje u još jednoj dramskoj izvdbi izvrsne glumačke ekipe.

Predstavu je režirao Gradimir Gojer, scenografiju postavio Josip Lovrenović, a za muziku se pobrinuo Đelo Jusić. U predstavi igraju Izudin Bajrović, Mediha Musliović i Nela Đenisijević.

Na konferenciji povodom premijere ove predstave Gojer je naglasio potpuno različitu teatarsku i književnu logiku u odnosu na onu koja je dominirala u vrijeme nastanka teksta. On je prvobitno bio posvećen preispitivanju kastinskih odnosa između gazdarica i sluga. "Kastinski odnosi danas nisu



režija: GRADIMIR GOJER



nestali, već su postisnuti u drugi plan, ali se danas tekst bavi suprotstavljanjem moći i nemoći jednog i drugog pola", riječi su režisera Gojera.

U kabinetu načelnika općine upriličen je i prijem za direktora Narodnog pozorišta povodom gostovanja ove predstave u našem gradu. Bila je ovo i prilika da se razgovara o konkretnim oblicima saradnje za naredni period kako bi se obogatila kulturna scena općine Cazin. "Mislim da bismo na području ove prekrasne općine mogli formirati svojevrsnu "isturenu scenu" našeg pozorišta i na taj način dugoročno planirati naše prisustvo na ovim prostorima", rekao je gospodin Gojer u razgovoru sa načelnikom Ogrješevićem i njegovim saradnicima.

Izložba filatelije u Cazinu

U maloj galeriji Doma kulture održana je izložba filatelije koju je općina Cazin organizirala u saradnji sa JP "BH



POŠTA" d.o.o. Sarajevo. Izložba je organizirana u cilju promocije novog izdanja poštanske marke sa motivom Starog grada Ostrožca-dvorac Lotara von Berkse. Markicu je ovo

Godina 2010 / Septembar / Broj 6



preduzeće dizajniralo na prijedlog Službe za opću upravu i društvene djelatnosti općine Cazin prema zadanoj tematici ugroženog graditeljskog naslijeđa BiH.

Svečanu promociju ovog izdanja nominalne vrijednosti 1,00 KM koji je pušten u promet 22.03.2010.godine, otvorio je mladi muzičar, učenik petog razreda Osnovne muzičke škole i nosioc prve nagrade 13.federalnog i 3.internacionalnog takmičenja učenika i studenata muzike, Harun Silić.

Ovom događaju su prisustvovali i predstavnici BH POŠTE iz Sarajeva. Tom prilikom je Izvršni di-

rektor JP "BH POŠTE", gospodin Emir Hajrić, uručio načelniku općine prvi primjerak ove prigodne poštanske marke.

Načelnik Ogršević se obratio prisutnim gostima i zahvalio na podršci koja će i ovim putem promovirati naša kulturna i prirodna bogatstva širom BiH. Prema njegovim riječima, dvorac Lotara von Berkse, kao i cijeli grad Ostrožac, zaslužuju poseban tretman, posebnu brigu i općina će učiniti sve da se ovo veliko zdanje naše lokalne zajednice zaštiti.

Cazinjani ispratili Ismeta Kasumovića

u penziju



Dana 17.05.2010. godine u Domu kulture upriličena je revijalna izložba Udruženja likovnih umjetnika našeg kantona, koju su domaćini i organizatori priredili u čast penzionisanja višegodišnjeg kulturnog radnika cazinske krajine. Riječ je o gospodinu Kasumoviću koji je kroz svoj radni vijek i znanje ostavio pečat na mnogim ljudima i velikom broju umjetničkih radova raznovrsnih pravaca. U njegovu čast je govorio gospodin Sead Emrić, načelnik općine Nermin OGREŠEVIĆ i sekretar ULUUSK gospodin Tomislav-Tomo TURKALJ.

Ovim povodom gospodinu Kasumoviću, uručen je poklon ispred općinskog organa uprave, ispred reda radnika Doma kulture i njegovog bivšeg kolektiva RTV Cazin.

Izložbu je posjetio veliki broj ljudi, ljubitelja likovnih djela i prijatelja našeg Ismeta, kome želimo sve najbolje u budućem životu. Iskreno se nadamo da će nastaviti svoj angažman u kulturi i na taj način i dalje biti prisutan u našim životima.



Okrugli sto: Internacionalna Kolonija skulptora Ostrožac–jučer, danas, sutra

Ove godine Program Kolonije skulptora Ostrožac bio je obogaćen jednim skupom na kome se raspravljalo o budućnosti monumentalnih spomenika koji se nalaze unutar ovog Starog grada. Učesnici okruglog stola su velika imena bh umjetnosti i novinarstva poput Mustafe Skopljaka, Darka Šobote, Dubravke Pozderac Lejlić i Dževada Sabljakovića, kojima su se pridružili Džemaludin Čaušević, Tomislav Turkalj, Sead Emrić i Nurija Ljubijankić sa naših područja.

Razgovaralo se o zbrinjavanju skulptura i njihovom budućem životu unutar neke od institucija moderne galerije ili muzeja, sa ciljem da se više i bolje promoviše njihova vrijednost. Prema riječima prisutnih, dalo se zaključiti da je svima zajednički interes i potreba sačuvati ovo bogastvo na našim prostorima i staviti ga u funkciju turističke promocije naše općine, ali i cijele BiH.

Istaknuta je ideja o nedjeljivosti ove kolonije i njenog ambijenta-Starog grada Ostrožca, zbog čega svi smatraju da će revitalizacija Ostrožca doprinijeti i većem značaju same Kolonije.

Uvodnu riječ na skupu je imao Ismet Kasumović, kao umjetnik, profesor i domaćin koji je najduže živio sa idejom Kolonije i njenim rezultatima. O povezanosti historije i umjetnosti govo-



rio je prof. Bahrudin Beširević, a na potrebu uključivanja ovih bisera u turističku ponudu osvrnula se Dubravka Pozderac, inače profesor na Akademiji likovnih umjetnosti u Sarajevu. Zaključeno je sa će naredne godine biti proširene aktivnosti Programa Kolonije skulptora Ostrožac, čime će ova jedinstvena "galerija pod vedrim

nebo" proširiti svoje djelovanje. Domaćin i organizator skupa, ali i realizator Programске šeme Kolonije je Dom kulture Cazin, koji je svojim projektnim prijedlozima obezbijedio sredstva za ovogodišnje povećanje fundusa u Parku skulptura Ostrožac. Moderator skupa je bila direktorica Doma kulture Hatidže Huremagić, a pridružio im se i predstavnik Ministarstva obrazovanja, nauke, kulture i sporta USK gospodin Edin Mašić.



Komentar

mahaluše



Nema razlike između Cazina i moje mahale. Osim možda što su ovdje ljudi dočekniji, nisu teretli, odišu nekom lahkoćom postojanja. Čine mi se i sitiji. Jel' to zato što mnogi gasterbajteruju po svijetu i ima se para pa se ima i „ščim“ ili je do mentaliteta. Rekla bih prije da je ovo drugo.
Piše: Indira KUČUK-SORGUČ

Kao deklariranoj mahaluši koju su Cazinjani dočekali kao najrođenijeg svog i priredili promociju knjige „Ja, mahaluša“ – prvi poslije Sarajeva, ne preostaje mi ništa drugo nego iskoristiti sve svoje verbalne komunikacijske vještine i promahalati ove ljude, ovaj kraj, ovu općinu... Onako, ne štedeći ih, do kraja....

„Nikad manjeg grada, a više prijaznih ljudi“ – rekla bih prvo. Ovo „manjeg“, bez uvrede, pitanje je samo perspektive. Iz sarajevske, Cazin je mala čaršija, nešto kao moja bistrička mahala. A u malom se sve ponajbolje vidi. Sve ti se kao na dlanu pruža. I otrov i med, i suze i smijeh. Sve se ovdje zna. A svako novo lice dobro osmotri. Al' bez zadnje namjere. Samo informacije radi. Pravi MOS (mahalska obavještajna služba). Nema razlike između Cazina i moje ma-

hale. Osim možda što su ovdje ljudi dočekniji, nisu teretli, odišu nekom lahkoćom postojanja. Čine mi se i sitiji. Jel' to zato što mnogi gasterbajteruju po svijetu i ima se para pa se ima i „ščim“ ili je do mentaliteta. Rekla bih prije da je ovo drugo.

I Sarajevo ima svoje gasterbajtere ali nije to isto. U mojoj mahali se vole pokazivati, hvalisavo pričati o svojim dunjalučkim uspjesima, bile si takmičiti između se ko je veći čardak napravio a ko noviju mečku parkir'o u garažu, bez da ih je briga za onog što nema „ščim“. Baš kao u onom vicu kad se Mujo hvalio Sulji da mu dolazi sin iz Njemačke s najnovijim merdžom pa se uhvatio posla da za takvu makinu napravi i propisnu veliku garažu. Uzdiglo se sve, pravi se garaža k'o atomsko sklonište. Vidio to Suljo kojem se zavrtjelo u glavi. Upravo mu se javio sin. Stiže i on iz Njemačke. Rek'o stiže vozom. „Kol'ku ću ja tek morat' garažu napravit'!“ - zabrinuo se Suljo.

U Cazinu, utisak je to ove mahaluše kojoj ne prođe godina a da barem jednom ne dođe u ovu zelenu oazu, sve je po adetu. I, nekako sve s mjerom. Nema srkleta. A radi se punom parom. I gradi se. Svaki moj dolazak proprati neka nova građevina. Jučer je to bila škola, danas je stambena zgrada, sutra će to biti možda – hotel. Da, još bi im samo trebao udoban hotelski kompleks. Pa da mi gosti iz Sarajeva parazitiramo malo duže na cazinskom gostoprimstvu i dobroti. A i ovako, nemamo skrupula. Sladimo se hurmašicama kakvih nema nigdje u Bosni, šetamo po najčišćoj čaršiji, muhabetimo sa ljudima koji su u ravnoteži sami sa sobom...Nekad mi se čini kad sam u Cazinu da sam na drugoj planeti.

Bosanskohercegovački sjajni putopisac impresivne bibliografije Zuko Džumhur je u „Nekrologu jednoj čaršiji“ napisao: „Samo se slike dugo pamte, a riječi već sutradan promijene svoj red.“ Ove slike ću dugo pamti. A svojih se riječi nikad neću odreći.

Indira KUČUK-SORGUČ je novinarka, publicistkinja i spisateljica. U Cazinu je 05. augusta promovirala knjigu priča „Ja, mahaluša“ koja je izazvala veliki interes Cazinjana i Cazinjanki. Njena knjiga proglašena je najprodavanijim pojedinačnim naslovom i prvencem na aprilskom Sajmu knjiga u Sarajevu.



Tehnički podaci

Izdavač: općina Cazin

Urednik: Irma Alićajić, dipl.pol.

Autorski tim:
Mirhad Pjanić, dipl.ing.maš.
Irma Alićajić, dipl.pol.
Hamdija Ljubijankić, prof.
Suad Rošić, dipl.ecc

Lektor: EVRON d.o.o. Banja Luka
Dizajn: EVRON d.o.o. Banja Luka
Štampa: GRAFIS d.o.o. Cazin